

EUSKARA. «Arlo instituzionala» Jaurilaritzak egindako EBPNren barnean uzteko eskaera egin dio Udalari EAJk

Tolosako EAJ, EA eta PP Euskararen Plan Estrategikoan sartu dira

Plana abiatu eta urtebetera etorri da erabakia; PP eta EA sartu dira lehenengo, eta EAJ gero

Eider Goenaga | TOLOSA

Kontseiluaren ekimenez Tolosaldeko Euskararen Plan Estrategikoa (TEPE) abiatu eta ia bi urtera, Tolosako EAJk, EAK eta PPk bat egin dute planarekin —Batasuna hasieratik izan da TEPEko kide—. Erabakia hartzen lehenak EA eta PP izan ziren; urriaren 22an parte hartu zuten lehendabizikoz TEPEren Jarraipen Batzordearen bileran.

Bilera hartan, EAKo ordezkari Andoni Iturzaetak esan zuen TEPE «euskararen alde lan egiteko gune aproposa» dela; PPko Angel Yañezek, berriz, «euskarak alderdien gaineratik» egon behar duela esan zuen.

EAJk, berriz, iragan larunbatean jakinarazi zuen TEPEn sartuko dela. Prentsaurrekoa eskaini zuten Tolosako Uri Buru Batzarreko kide Patxi Ezkiagak, EAJko zinegotzi Aitzol Arozek eta EAJko bozeramaile Jokin Bildarratzek.

Kritikei erantzun nahian

«Tolosaldea bailara euskalduna da, eta euskararen inguruko eztabaidek isla handia dute komunikabideetan. Hala, EAJren jarraiera kritikatzeko hainbat iritzi plazaratu dira azken hilabeteotan. Bai erakundeek bultzatzen duten politikan, bai alderdi gisa



TOLOSALDEAN EGUNERO

PPko Angel Yañez eta EAKo Andoni Iturzaeta (ezkeretik hasita, hirugarren eta laugarren lekuan eserita), TEPEren Jarraipen Batzordean lehendabiziko aldiz parte hartu zutenean.

hainbat arlotan egiten den lanean, euskararen inguruan EAJk duen jarrera azaltzeko elkartu gara gaur», esan zuten ordezkari jeltzaleek, TEPEn sartuko direla iragarri aurretik.

Baina, TEPEn sartzeko baldintza gisa, EAJk eskaera egin die Tolosako udal gobernari eta alderdiei Eusko Jaurilaritzaren Euskara Biziberritzeko Plan Nagusian sartu eta bi planak osagarri bihurtzeko.

Hala, normalizazioa helburu duten bi planak indarrean izango lirateke, aldi berean eta herri berean; baina bakoitzak arlo bat landuko luke. «Arlo instituzionala EBPNN sartuko litzateke. Baina, era berean, erakundeek gizarte eragileen proposamenak jaso beharko lituzkete, haiekin elkarlana bultzatzeko», azaldu zuten EAJko arduradunek.

TEPE Kontseiluaren ekime-

nez sortu zen, eta planaren aurrerapausoak hiru zutabe dituen Jarraipen Batzorde batek aztertzen ditu. Alderdiak, gizarte eragileak eta euskalgintza dira hiru zutabeak.

Orain arte, Tolosan zutabe bat koloka zegoela esan daiteke. Izan ere, Tolosako Udalean Sozialista Abertzaleek —lehen Batasuna— gehiengo osoa; eta haiek bakarrik zeuden TEPE

TEPE

333 eragileren konpromisoaz aurrera

Iaz abiatu zuten Tolosaldeko Euskararen Plan Estrategikoa (TEPE), eta, urtebete pasatxoan, eskualdeko eragile anitzek babesa lortu du. Iragan apirilean, esaterako, 333 gizarte eragilek hartu zituzten euskararekiko konpromisoak. Bakoitzak bere behar eta ahalmenaren arabera konpromisoak hartu zituen, TEPEren laguntzarekin sektorez sektore egindako diagnostika kontuan izan da.

TEPE Kontseiluak sustatutako Bai Euskarari Herrietan akordioaren barneko ekimena da, eta eskualdean euskarak duen egoeraren azterketatik abiatuta, normalizazioan urrats eragingarriak egitea da helburua; lehen aipatu gisan, eragile eta mugimendu sozialen laguntza eta konpromisoarekin.

Baina, gizarte eragileekin batera, alderdi politikoek eta euskalgintzak osatzen dute TEPEren Jarraipen Batzordea, eta horrek ematen dio hainbeste garrantzia EAJk, EAK eta PPk hartu duten erabakari.

barruan. Egundak, PSE-EE bakarrik gelditu da kanpoan, baina adierazi dute ez dutela baztertzen parte hartzea.

ALDERDIEN BALORAZIOA

ANTTON IZAGIRRE (Tolosako alkatea-Batasuna)

«Egon zitezkeen mesfidantzak praktikak uxatu ditu»



«Hasieratik gonbit egin genien alderdi guztiei TEPEn sartzeko, baina ez genuen lortu. Beraz, orain, ontzat hartu behar dugu EAJ, EA eta PP TEPEn sartzea. Errekonoizimendu bat egiten zaio orain arteko lanari, ontzat jo dute, eta hasierako mesfidantza guztiak praktikak uxatu ditu. Euskara gaietan behar-beharrezkoa da ekimenak alderdi guztien artean aurrera ateratzea, eta, alde horretatik, uste dut TEPE indartuta aterako dela. Bestalde, orain, udaletan aurrekontuak onartu behar ditugunean, orain arteko zailtasunak uxatu, eta

aukera emango digu proiektu berriak bideratzeko».

JOKIN BILDARRATZ (Tolosako EAJko bozeramaile)

«Euskararen inguruan bake soziala lortu nahi dugu»



«Baldintza batekin hartu dugu erabakia: alderdi gisa, TEPEn sartuko gara, Udala Biziberritze Planean sartzen bada. Alderdi politiko eta mugimendu sozial garen aldetik, TEPEn sartuko gara, gizarte lan egiteko; baina, era berean, pentsatzen dugu Udalak Biziberritze Planean sartu behar duela, ikuspegi instituzional batetik. Azken finean, EBPNN erakunde arteko plana da, Jaurilaritza, diputazioak eta udalak barne daudelarik, eta eskatzen dugu Uda-

la EBPNN sartzea. Gure helburua da, hainbat neurri hartuz, euskarari, normalizazioari eta erabilerari buruz guztiok daukagun kezak gainditzea. Eta ahal den liskar gutxien eragitea euskararen inguruan; ahal den bake sozial handiena lortzea».

OSCAR RENEDO (PSE-EEko zinegotzia)

«Ezadostasunak izan dira, baina ez dugu baztertzen sartzea»

«Oraingoz ez dugu ezer erabaki, baina astelehenean gaiaren inguruko bilera egingo dugu udaletxean alderdi guztiek, eta ikusiko dugu gauzak nola dauden. Gure erabakia baldintzen arabera izango da; estrategikoki nola garatuko den, nola uztartuko den EBPNNekin... Hori guztia argi ikusi nahi dugu. Hala eta guztiz ere, ez dugu inolaz ere aukera baztertzen; kon-

tua da orain arte desadostasun batzuk izan ditugula. Baina gai batzuk aztertu behar ditugu: Egundoren gaia eta beste».

ANGEL YAÑEZ (PPko zinegotzia)

«Euskararen gaia modu naturalagoan erabili behar genuke»

«Orain proposatu digute TEPEn sartzea, eta, bestelako garrantzirik eman gabe, baiezkota esan dugu, modu naturalean. Nola geldituko gara euskararen aldeko ekimenetatik kanpo? Ezta pentsatu ere. Azken finean, euskararen normalizazioa guztion helburua da. Nik euskararen gaia modu naturalenean erabiltzea nahiko nuke, eta askok ez dute horrela egiten. Asmo ezkuturik gabe sartu gara TEPEn, euskara guztion ondarea delako eta zaindu egin behar dugulako, naturaltasun osoarekin».

ANDONI ITURZAETA (Tolosako EAKo ordezkaria TEPEn)

«Euskararen inguruan plan guztiak uztartzea ona da»



«Sartu gara ikus-terko nola funtzionatzeko duen eta, bertan gaudela, aztertzeke aurrerantzean zer egin dezakegun eta zer ez. Hasieran ez ginen sartu komunikazio problema batengatik, baina pentsatzen dugu, ezer kritikatu edo lagundu baino lehen, ezinbestekoa dela barrutik ezagutzea. Euskararen inguruan plan guztiak uztartzen saiatzea ona da; Tolosan, TEPE eta EBPNN daude. Azken batean, ahal dela elkarlana bultzatzea beharrezkoa da; herri honetan, tamalez, gauza guztietan alderdikeria sartzen da, eta horrek ez du ezer-ten laguntzen».